



Na osnovu člana 17. stav (1) i člana 44. stav (1) Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine“, br. 25/04, 93/05, 48/07, 15/08, 63/23, 9/24 i 50/24), a u vezi sa članom 61b. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24, 72/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu, tužilac Sanin Bogunić, predsjednik Vijeća, sudija Velimir Ninković i Sanela Gorušanović - Butigan, potpredsjednici Vijeća, te sudija Izo Tankić, sutkinja Aleksandra Obradović, tužiteljica Bojana Jolović, advokatica mr. Duška Bogojević, tužiteljica Snježana Petković, sudija Sedin Idrizović, tužilac Saša Sarajlić, prof. dr. Džamna Vranić, tužiteljica Željka Fabić i advokatica Elma Veleđar Arifagić, na sjednici održanoj 09. i 10.04.2025. godine, donijelo je

R J E Š E N J E

o imenovanju predsjednika Općinskog suda u Zavidovićima

- I. Za predsjednika Općinskog suda u Zavidovićima imenuje se **Sunarić Boris**, na mandat od četiri (4) godine.
- II. Datum stupanja na dužnost imenovanog Vijeće će odrediti posebnom odlukom.

O b r a z l o ž e n j e

Na osnovu člana 36. Zakona o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je na internet stranici dana 07.11.2024. godine objavilo javni konkurs pod brojem: 04-07-3-4035-1/2024, kojim je oglašena pozicija predsjednika Općinskog suda u Zavidovićima.

Nakon provedene konkursne procedure, nadležno podvijeće je u skladu sa članom 61b. stav. (2) Poslovnika VSTV-a BiH za predsjednika Općinskog suda u Zavidovićima predložilo kandidate na rang listi pod rednim brojem 1 i 2 sa liste uspješnih kandidata, i to Sunarić Borisa i Kalabić Uzeira, koji na sjednici Vijeća izlažu program rada koji su ranije dostavili i izložili komisiji za obavljanje razgovora.

U skladu sa članom 61b. st. (3), (4) i (5) Poslovnika VSTV-a BiH, nadležno podvijeće dostavilo je Vijeću obrazložene prijedloge za kandidate sa rang liste pod rednim br. 1 i 2, sa bodovima koje su kandidati ostvarili u konkursnoj proceduri i njihovim programom rada, te rang listu kandidata.

Nakon izlaganja prijedloga podvijeća, predloženi kandidati su na sjednici Vijeća, u skladu sa članom 61b. st. (6) i (7) Poslovnika VSTV-a BiH, izložili svoj program rada, prema redoslijedu koji su ostvarili na rang listi.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovnikom VSTV-a BiH, te na osnovu uspjeha postignutog u konkursnoj proceduri i izlaganja programa rada, Vijeće je primjenjujući odredbe člana 61b. st. (8), (9) i (10) Poslovnika VSTV-a BiH, odlučilo da za predsjednika Općinskog suda u Zavidovićima

imenuje kandidata na rang listi pod rednim brojem 1 Sunarić Borisa, koji od 01.03.2021. godine obavlja dužnost sudije tog suda.

Prethodno imenovanju na poziciju sudije Općinskog suda u Zavidovićima imenovani kandidat je u periodu od 2017. g. do 2021. g. obavljao poslove višeg stručnog saradnika u Okružnom sudu u Doboju. U periodu od 2013. g. do 2017. g. obavljao je poslove rukovodioca službe za pravne, kadrovske i opće poslove u Javnom preduzeću šumarstva „Šume Republike Srpske“, Šumsko gazdinstvo „Doboj“ Doboj, a u periodu od 2012. g. do 2013. g. u istom javnom preduzeću obavljao je poslove pravnog referenta.

Vijeće je nakon ocjene stručnosti kandidata, sposobnosti pravne analize, komunikativnosti i sposobnosti prezentacije, sposobnosti kandidata da odgovorno, nezavisno i nepristrasno obavlja funkciju sudije, uzimajući u obzir, između ostalog, dosadašnje radno iskustvo kandidata, profesionalnu nepristrasnost i ugled, ponašanje van posla, edukaciju i usavršavanje, objavljivanje stručnih i naučnih radova, te druge aktivnosti u struci, rukovodne vještine i iskustvo, sposobnost upravljanja ljudskim potencijalima i ocjene kriterija podobnosti, ocijenilo da imenovani kandidat u potpunosti ispunjava uslove za imenovanje propisane u članu 43. Zakona o VSTV-u BiH.

Kada je u pitanju broj ostvarenih bodova, Vijeće je imalo u vidu da je imenovani kandidat u toku konkursne procedure, u pogledu bodova za kriterij stručnosti i sposobnosti pravne analize ostvario ukupno 96 bodova od mogućih 100 bodova, dok je na razgovoru pred nadležnom komisijom Vijeća u pogledu drugih kriterija ostvario ukupno 26,9 bodova od mogućih 30 bodova, što ga je u konačnici rangiralo na prvom mjestu rang liste kandidata sa ukupno ostvarenih 122,9 bodova od mogućih 130 bodova.

Kriteriji stručnosti i sposobnosti pravne analize imenovanog kandidata, koji je nosilac pravosudne funkcije, utvrđeni su na osnovu ocjene rada za posljednje tri godine za koje je ocijenjen, i to za 2021. g., 2022. g. i 2023. g., a računajući do dana isteka roka za podnošenje prijava po navedenom konkursu.

Na osnovu ocjena rada za 2021. g., 2022. g. i 2023. g., odnosno ocjena 4, 5 i 5, utvrđeno je da je kandidat za navedene tri godine za koje je ocijenjen ostvario prosjek od 4,7. Prema odredbama člana 56. stav 2. Poslovnika VSTV-a BiH, njegovoj prosječnoj ocjeni rada za prethodne tri godine koja iznosi 4,7 dodijeljen je ekvivalentan broj bodova koji se koristi u konkursnoj proceduri od 96 bodova.

Ostali kriteriji, koji se odnose na sposobnost kandidata da odgovorno, nezavisno i nepristrasno obavlja funkciju za koju se prijavio, profesionalne nepristrasnosti i ugleda, te ponašanja van posla, dosadašnjeg radnog iskustva kandidata, edukacije i usavršavanja, objavljivanja stručnih i naučnih radova, te drugih aktivnosti u struci, komunikativnosti, rukovodnih vještina i iskustva, te sposobnosti upravljanja ljudskim potencijalima utvrđeni su na razgovoru pred nadležnom komisijom Vijeća, kojom prilikom je svaki član komisije nezavisno bodovao kriterije, kako je to propisano u čl. 54., 54b., 54d., 54e. i 54f. Poslovnika VSTV-a BiH, pri čemu je kandidat po tom osnovu u konačnici ostvario ukupno 26,9 bodova. Konačan broj bodova koje kandidat ostvari na razgovoru predstavlja prosjek zbira ocjena po kriterijima koji se ocjenjuju na razgovoru.

Pored ukupnog broja ostvarenih bodova, na osnovu kojih je kandidat u skladu sa čl. 59a. stav (2) tačka a) Poslovnika VSTV-a BiH stekao uvjete za predlaganje i imenovanje na poziciju predsjednika općinskog suda, Vijeće je vodilo računa o okolnostima koje su relevantne za procjenu podobnosti iz člana 48a. Poslovnika VSTV-a BiH, ocijenivši da ne postoje okolnosti koje izazivaju sumnju u pogledu podobnosti kandidata za poziciju za koju se prijavio.

Imenovanje navedenog kandidata, pored uspjeha postignutog u konkursnoj proceduri, opredjelio je i sveobuhvatan program rada Općinskog suda u Zavidovićima za mandatni period koji je kandidat dostavio u toku konkursne procedure i izložio tokom obavljenog razgovora pred nadležnom komisijom Vijeća, kao i na sjednici Vijeća. Kroz izlaganje programa rada imenovani kandidat je iskazao visoke rukovodne i organizacione vještine i sposobnosti upravljanja ljudskim potencijalima. Dokaz tome je

maksimalan broj bodova koji mu je dodijeljen za kriterij rukovodnih vještina, sposobnosti i osobina od strane članova Komisije za obavljanje razgovora.

Detaljno i uvjerljivo je obrazložio strateške ciljeve i ciljane rezultate, te je predložio mjere za unapređenje efikasnosti i kvalitete rada suda. Vrlo jasno je izložio moguće prepreke koje bi mogle biti od uticaja na postavljene ciljeve, kao i strategije za njihovo prevazilaženje.

Iskazao je spremnost za unapređenje rada navedenog suda, s naglaskom na profesionalniji odnos prema poslu svih zaposlenih, poboljšanje interne komunikacije između predsjednika suda i sudija i drugih zaposlenih, te sudija i zaposlenih međusobno, povećanje procenta realizacije Plana rješavanja predmeta, a samim tim i starih predmeta, isticanjem posebne pažnje na rješavanje predmeta korupcije, skraćivanje predvidivih rokova za rješavanje predmeta, povećanje kvaliteta rada suda i ravnomjernom opterećenju sudija, poboljšanju uslova rada zaposlenih u sudu, smanjivanju broja zastarjelih krivičnih i prekršajnih predmeta, većoj otvorenosti, odnosno transparentnosti suda prema drugim institucijama, medijima i građanima.

Kroz izlaganje programa rada pokazao je da se radi o osobi koja može odgovoriti svim zadacima i izazovima koji se postavljaju pred ovako značajnu rukovodnu poziciju.

Uzimajući u obzir navedeno, Vijeće je ocijenilo da je imenovani kandidat u potpunosti ispunio zakonom propisane uslove, kao i druge kriterije koji se cijene prilikom izbora kandidata, kako bi bio imenovan na poziciju predsjednika Općinskog suda u Zavidovićima.

Kandidat se na dužnost predsjednika suda, u skladu sa članom 28. stav (2) Zakona o VSTV-u BiH imenuje na mandat od 4 (četiri) godine.

U pogledu dijela rješenja o stupanju na dužnost imenovanog, isto se odgađa do okončanja dodatne provjere iz člana 86c. Zakona o VSTV-u BiH, a u vezi sa članom 19. stav (3) Pravilnika Visokog sudskog i tužilačkog vijeća Bosne i Hercegovine u vezi s izvještavanjem o imovini i interesima („Službeni glasnik BiH“ br. 20/24 i 57/24), odnosno do okončanja upravnog spora ukoliko je pokrenut protiv rješenja o imenovanju.

Ovo rješenje će biti objavljeno na internet stranici Vijeća, shodno članu 44. stav (1) Zakona i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

Uputa o pravnom lijeku: Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-3-1429-1/2025
Datum: 10.04.2025. godine



